

आकाशवाणी

खबरां प्रोमिला जम्वाल कोला।

1. गृहमंत्री अमित शाह होरें आखेआ छड़ा केन्द्र सरकार ते प्रधानमंत्री नरेन्द्र मोदी गै जम्मू कश्मीर दा राज्य दा दर्जा बहाल करी सकदे न।
2. विदेश मंत्री डॉ. एस.जयशंकर पैहली-पैहली भारत-खाड़ी सैहयोग परिषद जीसीसी विदेश मंत्रिणं दी बैठक च हिस्सा लैने लेई रियाघ, सउदी अरब जा'रदे न।
3. आबूधाबी दे शहजादे शेख-खालिद-बिन-जायेद-अल-नाहयान अज्ज भारत दे सरकारी दौरे पर आवा'रदे न।
4. भारत नै जिम्बाबवे दे लोकें दी खुराक सुरक्षा जरूरतें गी ध्यानै च रखदे होई मनुक्खी आधार पर जिम्बाबवे गी सहायता भेजी ऐ।
5. इटली दिणं प्रधानमंत्री जिर्योजिया मैलोनी होरें आखेआ जे भारत ते चीन जनेह् मुख्य यूक्रेन संकट गी नबेड़ने लेई अपनी भूमका नभाई सकदे न।
6. पैरिस पैरालंपिक्स खेड्डें दे 10 दिन पूरे होने पर भारत नै 2 होर तगमे जित्तिथै अपना गलबा बनाई रखेआ ऐ।

<><><><><><>

Amit Shah

गृह मंत्री अमित शाह होरें आखेआ ऐ जे केन्द्र सरकार गै जम्मू-कश्मीर दा राज्य दा दर्जा बहाल करी सकदी ऐ। कल जम्मू च भारती जनता पार्टी दे कारकुनें गी श्री शाह होरें आखेआ जे उनें आपूं 2019 ब'रे च संसद च आखेआ हा जे विधानसभा चुनाणं मगरा मुनासब मौके पर जम्मू-कश्मीर दा राज्य दा दर्जा बहाल कीता जाह्ग। श्री शाह होरें आखेआ जे राज्य च औने आहले विधानसभा चुनांS ऐतिहासिक होडन कीजे एह चुनांS दर्जा 370 गी खत्म कीते जाने मगरा पैहली बारी करोआए जा'रदे न। गृह मंत्री होरें आखेआ जे एह आजादी मगरा पैहला मौका होग जदुं जम्मू-कश्मीर दी जनता इक झंडे यानि तिरंगे ते बाबा साहेब अम्बेडकर दे संविधान तैहत मतदान करोग। श्री शाह होरें दोष लाया जे विपक्षी दल जम्मू-कश्मीर च परानी बवस्था कायम करना चांहदे न ते पाकिस्तान कन्नै गल्लबात दे पक्खै च न। उनें साफ आखेआ जे शांति बहाली होने तगर पाकिस्तानक नै कोई गल्ल नेई होग। श्री शाह होरें आखेआ जे राष्ट्री जनतांत्रिक गठबंधन एनडीए दी सरकार गुज्जर, फ्हाड़ी, बक्करवाल ते दलितें सने कुसै बी समुदाय कन्नै बेन्यायी नेई होन देग जिनें'गी भारती जनता पार्टी नै आरक्षण दित्ता ऐ।

जरूरतें गी पूरा करने च मदाद मिलोग। सरकारै अल-नीनो करी सोक्के दी मारै हेठ आए दे मलावी दे लोकें लेई 1 जहार मीट्रि टन चौल भेजे न।

<><><><><><>

Italy

इटली दिएं प्रधानमंत्री जॉर्जिया मिलोनी होरें आखेआ ऐ जे यूक्रेन संघर्ष गी हल करने लेई भारत ते चीन महत्वै आहली भूमिका निभाई सकदे न। रूस दे राष्ट्रपति व्लादिमीर पुतिन होरें बी हाल च आखेआ हा जे मजूदा संकट गी हल करने च भारत दी भूमिका अहम होई सकदी ऐ। मिलोनी हुंदा एह बयान इटली च यूक्रेन दे राष्ट्रपति वोल्दोमीर जेलेन्सकी हुंदे'नै मलाटी दे मगरा आया ऐ। प्रधानमंत्री मोदी होरें पिच्छले महीने यूक्रेन दी जात्तरा दरान जेलेन्सकी होरें गी आखेआ हा जे मजूदा संघर्ष गी खत्म करने लेई यूक्रेन ते रूस गी तुरत गल्लबात करनी चाईदी ते इस इलाके च रमानदारी ब्हाली च कुसै बी भूमिका लेई भारत तैयार ऐ। श्री मोदी होरें आखेआ जे भारत शुरु थमां गै इस संकट दे शांतिपूर्ण हल दे पक्खै च रेया ऐ ते ओह एहदे लेई निजी तौर पर बी कोशशां करने लेई तैयार न। यूक्रेन दी जात्तरा थमां तकरीबन डेढ़ महीने पैहले श्री मोदी होरें रूस च राष्ट्रपति व्लादिमीर पुतिन हुंदे कन्नै गल्लकत्थ बी कीती ही।

<><><><><><>

Paralympics

पेरिस च खेड्डी जा'रदिएं पैरालंपिक खेड्ढें च 10एं दिनें दी खेड्ढ खत्म होने तगर द'ऊं तगमे होर जित्तिथै भारत नै अपना गलबा कायम रक्खेआ ऐ। नवदीप सिंह नै मर्दे दे नेजा सुट्टने दे मुकाबले एफ41 च ईरानी खड्ढारी गी हराइयै सुन्ने दा तगमा हासल कीता। ईरानी खड्ढारी गी ओहदे माड़े बवहार लेई अयोग्य करार देई दित्ता गेआ। तोआई सिमरन शर्मा नै महिलाएं दी 200 मीटर टी12 ट्रैक द्रौड़ च कैह दा तगमा जित्तेआ। भारत पदक तालिका च 7 सुन्ने दे, 9 चांदी दे ते 13 कैह दे तगमे हासल करियै 16मीं थाहरै पर पुज्जी गेआ ऐ।

<><><><><><>

WB

पच्छम बंगाल दी मेडिकल परिषद नै आर.जी. कर मेडिकल ऑलेज दे अस्पताल गी कारण दस्सो नोटिस भेजेआ ऐ ते साबका प्रिंसिपल गी गिरफ्तार करी लैता ऐ ते 72एं घैंटें दे अंदर-अंदर कोई मुनासब जवाब देने लेई आखेआ ऐ। ईआं नेई करने दी सूरती च उंदा पंजीकरण रद्द करी दित्ता जाहग।

<><><><><><>

Telangana Rains

तेलंगाना च हाडें दी मारै हेठ आए दे खम्मम ते महबूबाबाद जिलें च कल भारी बरखा होई। महबूबाबाद च अज्ज बड्डलै 6 बजे तगर 182 मिलीमीटर बरखा ते खम्मम दे तल्लाडा च 122 मिलीमीटर बरखा दर्ज कीती गई। मुन्नरू ते होरनें दरेयाएं च उफान दी शँका करी जिले दे हेठले इलाकें च रौहने आहले लोकें गी सौहगे-सतर्क रौहने लेई आखेआ गेआ ऐ। तोआई राज्य च खम्मम ते महबूबाबाद सने 4 जिलें च ऑरेंज अलर्ट जारी कीता गेदा ऐ। कुमराम, भीम, आसिफाबाद, मंचिर्याल, जयशंकर भूपालपल्ली, मुलुगू, भद्राद्रि ते कोटागुडम सने 10एं जिलें च अगले दौं दिनें तगर बरखा दा येलो अलर्ट जारी कीता गेआ ऐ। अगले 5एं दिनें तगर राज्य दे सब्बनें जिलें च गरज-चमक दे कन्नै बरखा बरने ते 40 किलोमीटर फी घँटे दी रफ्तार कन्नै हवां चलने दा अंदाजा ऐ।

<><><><><><>

IMD

मौसम विभाग नै अज्ज यानम ते आंध्र प्रदेश दे समुंदरी कंड्डे आहले इलाकें च बडी भारी बरखा दी पेशगोई कीती ऐ। मौसम विभाग नै असम, मेघालय, नागालैंड, मणिपुर, मिज़ोरम, त्रिपुरा ते मध्य प्रदेश च अगले 7एं दिनें तगर भारी बरखा दे असार जताए न।

<><><><><><>

Bal Puskar

प्रधानमंत्री राश्ट्री बाल पुरस्कार 2025 लेई नामांकन इस म्हीने दी 15 तरीक तगर कीते जाई सकडन। महिलाएं ते बच्चें दे विकास सरबन्धी मंत्रालय हर ब'रे जनवरी च इस पुरस्कार समारोह दा आयोजन करदा ऐ। जेतूएं दी घोषणा इस ब'रे 26 दिसंबर गी वीर बाल दिवस पर कीती जाह्ग। इस पुरस्कार दा मकसद बच्चें दी हिम्मत, दलेरी, समर्थ, पक्के निश्चे ते जोश गी सम्मानित करना ऐ। पुरस्कार लेई 5एं ब'रें शा 18एं ब'रें तगर दी उम्मी दे बच्चें लेई आवेदन कीता जाई सकदा ऐ।

<><><><><><>

US Open

यूएस ओपन च दुए पाय दी खड्डारन बेलारूस दी आर्यन सवालेंका नै अपनी पैहली खेड्ड च यूएस ओपन खताब जित्ती लैता ऐ। उनें जेस्सिका पेगूले गी सिद्दे सैटें च हराया ऐ।

<><><><><><>